

**Suliffeerunnermi ikiorsiissutinik ullut 14-kkaarlugit tunniunneqartartunik pisartagaqartut, ulluni suliffiusuni tulleriinni marlunni pisartakkaminnik ilannganneqartarunnaarnissaat siunertaralugu, Naalakkersuisut Ukiakkut Ataatsimiinnermi 2017-imi, Suliffeerunnermi ikiorsiissutit pillugit inatsisartut inatsisaannut nr. 2, 15. maj 2014-imeersumut, allannguutissamik siunnersuuteqaqquneqarnissaannik aalajangiiffigisassatut siunnersuut.**  
*(Inatsisartunut ilaasortaq Agathe Fontain, Inuit Ataqatigiit)*

### **pillugu**

**Inuussutissarsiornermut Ataatsimiititaliap**

**siunnersuutip aappassaaneerpeqarneranut**

### **ISUMALIUTISSIISUTAA**

Inuussutissarsiornermut Ataatsimiititaliap suliarinninnermini ilaasortarai:  
Inatsisartunut ilaasortaq Siverth K. Heilmann, Atassut, siulittaasoq  
Inatsisartunut ilaasortaq Sara Olsvig Inuit Ataqatigiit, siulittaasup tullia  
Inatsisartunut ilaasortaq Justus Hansen, Demokraatit  
Inatsisartunut ilaasortaq Suka K. Frederiksen, Siumut  
Inatsisartunut ilaasortaq Múte B. Egede, Inuit Ataqatigiit

Ulloq 12. maj 2016-imi siullermeerinninnerup kingorna ataatsimiititaliap siunnersuut misissorpaa.

#### **1. Siunnersuutip imarisaa siunertaalu**

Siunnersuutip nassatarissavaa suliffeerunnermi ikiorsiissutit pillugit inatsisartut inatsisaannut nr. 2, 15. maj 2014-imeersumut allannguutissatut siunnersuummik saqqummiusseqqullugit Naalakkersuisut peqquneqarnissaat, taamaaliornikkut suliffeerunnermi ikiorsiissutinik ullut 14-kkaarlugit tunniunneqartartunik pisartagaqartut ulluni suliffiusuni tulleriinni marlunni pisartakkaminnik ilannganneqartarunnaassallutik. Allannguutissatut siunnersuut UKA2017-imi saqqummiunneqassaaq.

Siunnersuut akuerineqassappat inuit pineqartut pisortat ikiorsiissutaannik pisartagallit, taartitut allatulluunniit sulilaarnissamut kajuminnerulissasut aammalu aningaasaqarnikkut toqqaannartumik iluanaarutissaqarlutik paasigunikku ataavartumik sulilernissamut kajumissuseqarnerat annertunerulissasoq siunnersuuteqartoq isumaqarpoq.

## **2. Ataatsimiititaliap siunnersuummik suliarinninnera**

Naalackersuisut siunnersuummut matumunnga akissuteqaamminni paasissutissiinerat malillugu suliffeerunnermi ikiorsiissutit pillugit inatsisartut inatsisaata nr. 2, 15. maj 2014-imeersup (UPA2014/127) akuersissutigineqarneratigut suliffeerunnermi ikiorsiissutinik pisartagallit taartaasutut suliffinni kommunimit innersuunneqartuni piffissami sivikitsuinnarmi suligunik suliffeerunnermi ikiorsiissutinik annaasaqaatiginngisaminnik sulinissamut § 9, imm. 4 naapertorlugu periarfissaqalerput.

Aalajangersakkap nassatarisaanik inuit paarlatsitut sulisinnaanerat ajornannginnerulissasoq Naalackersuisut naatsorsuutigaaat. Suliffissani kommuninit innersuunneqartuni sulerusussuseq annertusissasoq aamma naatsorsuutigineqarpoq. Inatsimmut nassuiaatini allassimavoq “ullut ataasiakkaat” ullut tallimat angusinnaagaat.

Inunnut ataasiakkaanut atatillugu aalajangersakkap nassataraa ullut aningaasarsianik isertitaqarfiusut suliffeerunnermi ikiorsiissutinik ilanngaatigineqartarnerat, tamatumali kinguneranik suliffeerunnermi ikiorsiissutinik pissarsisinnaatitaaneq aannaaneqarnani. Aalajangersakkami allassimavoq suliffeerunnermi ikiorsiissutinik pissarsisumut suut iluaqutaanerunersut apeqqutaatillugu pineqartup suliffeerunnermi ikiorsiissutit ima ikilisinneqarnissaat toqqarsinnaagaa:

- 1) ulluni qanoq amerlatigisuni akissarsiaqarluni isertitaqarsimaneq imaluunniit
- 2) aningaasat qanoq amerlatigisut tunniunneqarsimanersut malillugu.

Aalajangersagaq taanna ataatsimiititaliamit ima paasineqarpoq innuttaasup taartaanermi aningaasarsiani paariinnarusunnerlugit nammineq toqqarsinnaagaa, taamaaliorunili inatsimmi tassani § 14 naapertorlugu nalinginnaasumik ikiorsiissutinik akunnernut arfineq pingasunut naapertuuttumik ilanngaaffigineqassaluni imaluunniit suliffeerunnermi ikiorsiissutinik pissarsiaqarnissani toqqarsinnaagaa, taamaaliorunilu taartaanermi aningaasarsiaminit ilanngaaffigineqassalluni. Aningaasaqarnikkut pissarsiaqarnarnerpaaq ataasiakkaanit toqqarneqassasoq naatsorsuutigineqartariaqarpoq.

Katillugit sapaatit akunnerisa 15-it suliffeerunnermi ikiorsiissuteqarfiusinnaasut ingerlaneranni taartaalluni sulinerni tamarmik immikkut ullut tallimat tikillugit sivilusussuseqarsinnaasuni qasseriarluni sulisinnaaneq inatsisip suliarineqarnerani apeqqutinngortinneqarsimannngilaq. Taamaalilluni inuit ataasiakkaat taartaalluni sulinissamut aningaasatigut kajumissuseqalersinneqarnissaat maanna aaqqissuussinermi ilanngunneqarsimasorinarpoq.

Taamani Inuussutissarsiornermut Ataatsimiititaliaasup isumaqatigiittup inatsisissatut siunnersuut aamma taperserpaa. Aammattaaq innuttaasut amerlanerit suliffeqaannarnissaannik qulakkeerinninnissamut aalajangersagaq peqataaqataajumaartoq Inuussutissarsiornermut Ataatsimiititaliaq taamani isumaqarpoq.

## **2.1 Siunnersuutip aningaasatigut kajumissaataasinnaanera**

Tunngavilersuut taanna siunnersuummik matuminnga siunnersuuteqartup aamma tunngavilersuutigigaa ataatsimiititaliaq isumaqarpoq. Siunnersuut una malillugu inuk piffissami suliffeerunnermi ikiorsiissutinik pisartagaqarfimmini taartaalluni sulisoq suliffeerunnermi ikiorsiissutit qaavatigut taartaasutut ullunut marlunnut akissarsiani paariinnarsinnaassavai.

Sapaatit akunnerini 15-ini suliffeerunnermi ikiorsiissutinik pisartagaqarnissaq periarfissaamat siunnersuut manna akuersissutigineqassappat pineqartoq tamarmik ullunik marlunnik sivisussusilinnik taartaalluni 6,5-leriarluni sulisinnaassaaq, tamatumalu peqatigisaanik suliffeerunnermi ikiorsiissutinik pisartaqarsinnaalluni.

Siunnersuut Inatsisartunit akuerineqassappat piffissap sapaatit akunnerisa 15-it suliffeerunnermi ikiorsiissuteqarfiusup ingerlanerani ullut 13-it suliffeerunnermi ikiorsiissuteqarfiusut annertoqataannik inuiaqatigiit aningaasartuuteqarnerunnerannik tamanna kinguneqarsinnaavoq.

Piffissami suliffeerunnermi ikiorsiissutinik pisartagaqarfiusumi taartaalluni sulinissamut inuit ataasiakkaat aningaasaqarnikkut suli kajuminnerulersinneqarsinnaasut ataatsimiititaliap takusinnaavaa. Pisortanut aningaasaqarnikkut allaffissornikkullu kingunerisassat pillugit immikkoortumi siunnersuuteqartup tunngavilersuummini oqaatigaa suliffissaaleqisup sulilernerani inuiaqatigiit iluanaarutissaat naatsorsorneqarsimasut. Suliffissaaleqisoq sulileraangat tamanna akileraarutitigut isertitat ikiorsiissutitigullu sipaarutit aqutugalugit pisortat aningaasaqarnerannut iluaqutaasartoq immikkoortumi tassani aamma allassimavoq. Siunnersuut una isumaginninnermi ikiorsiissutinik sipaaruteqarnerinnarmik imaasinnaavoq nassataqanngitsoq. Aningaasartuuteqarnerusinnaanermut aaqqissuussinertut siunnersuutigineqartup qanorpiaq atorneqarnissaa aqutsivigineqarnissaalu apeqqutaassaaq.

Pisortanit isumaginninnermi ikiorsiissutinik pisartagaqarnerup nalaani sulinermi aningaasarsianik isertitaqarnissaq periarfissaasariaqanngitsoq siunnersuummut uunga akissuteqaamminni Naalakkersuisut oqaatigaat. Naalakkersuisulli akissuteqaamminni oqaatigaat inatsit 2017-imi upernaakkut ataatsimiinnissamut iluarsaallugu aallartinneqarsimasoq. Taamaattumik apeqqut matumani pineqartoq nutaamik inatsiliorluni suliame tamatumani ilaatinneqarnerneq paasissutissiissutigineqassasoq ataatsimiititaliamit kissaatigineqarpoq. Tamatumunngattaq ilanngullugu piffissami suliffeerunnermi ikiorsiissutinik pisartagaqarfiusumi taartaalluni sulinissamut aningaasaqarnikkut kajumissaarutitigut iluaqutissanillu allanik ilanngussinissaq Naalakkersuisut isumaliutigineraat.

### **3. Siunnersuutip aningaasaqarnikkut kingunerisassai**

Aalajangiiffigisassatut siunnersuutit piviusunngortinneqarneranni aningaasaqarnikkut allaffissornikkullu kingunerisassat siunnersuummut tunngavilersuummi nassuiaatigineqartassasut Inatsisartut suleriaasianni § 33, imm. 1-imi allassimavoq. Siunnersuut tamatumunnga naapertuuttumik suliarineqarsimasoq ataatsimiititaliamit maluginiarneqarpoq. Taamaalilluni siunnersuutip malitsigisaanik aningaasaqarnikkut kingunerisinnaasat siunnersuuteqartup tamatumunnga naapertuuttumik nassuiaatigalugillu saqqummiuppai.

### **4. Ataatsimiititaliap inassuteqaatai**

Amerlanerussuteqartut Siumup, Inuit Ataqtigiit Atassutillu ilaasortaataasa siunnersuut akuerineqassasoq inassutigaat.

Ikinnerusussuteqartut Demokraatit ilaasortaataasa matuma kingulianiittunik oqaaseqaaseqaateqarlutik siunnersuut itigartinneqassasoq inassutigaat:

Isumaqarpugut allanik pitsaanerusunillu periarfissaqartoq suliffissaaleqisut sulileqqullugit kaammattorniarlugit. Assersuutigalugu sulinermit ilannga atorneqalersinnaavoq imaluunniit akissarsianut akileraarut appartinneqarsinnaavoq. Aamma pisortat ikiorsiissutaat naleqqussarneqarsinnaapput sulilernissaq pilerinarnerulersillugu.

Demokraatit isaannik isigalugu qularutissaanngilaq pisariaqarluinnartoq suliffeqarnissaq pisortat ikiorsiissutaannik nappateqarnermut naleqqiullugu.

Taama oqaaseqarluni isumaliutissiissumilu allassimasutut paasinnilluni ataatsimiititaliap siunnersuut aappasaaniigassanngortippaa.

---

Siverth K Heilmann  
Siulittaasoq

---

Sara Olsvig  
Siulittaasup tullia

---

Justus Hansen

---

Suka K Frederiksen

---

Múte B. Egede